



REPÚBLICA DEMOCRÁTICA DE TIMOR-LESTE

**DISCURSO
SUA EXCELÊNCIA PRIMEIRO-MINISTRO
KAY RALA XANANA GUSMÃO NIAN
IHA OCASIÃO LANÇAMENTO BA CAMPANHA DISSEMINAÇÃO
SENSUS FO FILA FALI**

Centro Convenções Díli nian

4 Novembro 2011

Sua Excelência Sr. Presidente República

Distintos Deputados

Caros colegas Membros Governo

Ilustres membros Corpo Diplomático

Exmo. Sr. Representante UNFPA nian

Exmo. Sr. Representante UNICEF nian

Representantes husi Organizações Não-Governamentais

Exmos. Senhores Administradores Distritos no Subdistritos

Exmos. Senhores Chefes Suco

Distintos convidados

Senhoras no Senhores,

Ho laran haksolok bot tebetebes mak ha'u participa iha cerimónia ba lançamento Sensus Fo Fila Fali ne.

Depois-de knar bot nebé hala'o iha 2010, husi Direcção Nacional de Estatística iha âmbito Ministério das Finanças, kona-ba actualização informações estatísticas nian ho referências ba aspectos demográficos, económicos no sociais ita-nia Nação nian, hanoin mos atu hala'o projecto ida ne kona-ba disseminação dados ne'ebé importantes tebetebes.

Tanba ne, hau hakarak hahú agradece ba maluk sira hotu nebé fó tulun ba projetu ida ne, hanesan membros Governo nebé envolvidos ho instituições Estado nian sira seluk, Agências Nações Unidas nian ho ONGs, lori agradece mos ba apoio técnico ho financeiro husi parte UNFPA ho UNICEF.

Senhoras no senhores,

Hanesan ita-bot sira hatene, nação ida composta husi território ida ho ninia população tomak. Governo ida nebé la conhece nia população rasik significa katak la conhece mos nação nebé nia ukun, portanto, nia iha ona iha dalan klaran atu monu ba rai ku'ak. Qualquer governo iha necessidade, ou antes, dever, atu hatene no hatene didi'ak nia população.

Tanba ne mak ita fó especial importância ba resultados nebé hetan liuhusi recenseamento 2010 nian ne. Governo, atu bele implementa políticas nebé di'ak ba ita-nia Povo, tenke hatene ita ema hira, ita ne sé, ita moris iha nebé no moris oinsá los!

Só hetan tiha retrato real no objectivo ida kona-ba população nebé hela iha Timor-Leste hodi hatene mos sira-nia condições moris, mak bele halo plano no halo intervenção ho forma responsável, la kaer ba pressupostos nebé sala, hodi hadi'a condições moris timoroan tomak nian.

Nuné, ho resultados husi Censos, ita bele atua di'ak liután tuir circunstâncias reais rai ne nian, lori tan benefícios ba ita nia Povo. Mas oinsá? Investe di'ak no barak liután iha saúde, educação, habitação ho infra-estruturas básicas sira seluk.

Tanba ida ne mak Plano Estratégico de Desenvolvimento, nebé lança iha fulan Julho liubá, usa Censos lori substancia verdadeiros progressos rai ne nian no lori define políticas no programas nebé precisa ba desenvolvimento nacional.

Plano ida ne, nebé representa esperanças ho aspirações povo timor tomak nian iha desenvolvimento nacional, ba tinan 20 oin mai, kona-ba áreas principais tolu: capital social, infra-estruturas no desenvolvimento económico.

Ho liafuan badak, ita-nia Plano hanesan pacote integrado políticas estratégicas nian nebé atu implementa iha curto, médio no longo prazo, haré tuir ba necessidades rai ne nia. Entre buat seluk, kona-ba curto prazo, hau destaca objectivos hirak ne:

- To'o 2015 sei implementa sistema kona-ba cuidados saúde primários. Cada suco sei iha nia clínica saúde rasik, ho médico ida no enfermeiro ida.
- To'o 2015, iha ona ensino básico nebé ho qualidade ba 93% labarik timoroan no, to'o 2020, ita bele garante katak jovens sira hotu bele remata ensino secundário. Visão ida ne sei concretiza liuhusi fase intensiva construção escolas, formação intensiva ba professores ho implementação política inclusão social iha educação.
- To'o 2015, sei halakon tomak analfabetismo iha grupos etários hotu-hotu população nian.
- To'o 2015, sei harí sistema segurança social contributivo ida, hodi garante pensão ba trabalhadores timoroan hotu-hotu.
- To'o 2015, sei harí uma rihun limanulu resin lima (55.000), lori tulun famílias iha país tomak laran.

- To'o 2015, ita sei reabilita estradas rurais, nebé bele tahan hasoru condições climáticas no reabilita estradas nacionais hotu-hotu no, kleur liu, to'o tinan 2020, ita bele halo hotu ona ita-nia rede rodoviária nacional.
- To'o 2015, ita ultrapassa ona objectivo nebé dehan katak 75% husi população rural sei hetan acesso ba bé nebé mós, seguru no sustentável.
- To'o 2015, população tomak sei iha acesso ba electricidade 24 horas loroloron.
- Agricultores sira sei simu subsídios ho créditos sazonais, hodi permite hasae maka'as ita-nia produtividade agrícola, no assegura katak to'o tinan 2020, aihán nebé iha, sei barak liufali ita-nia necessidades.

Senhoras no senhores,

Hanesan ita-bót sira hatene, necessidades sei la hanesan iha regiões hotu-hotu iha país laran no iha cada suco Timor-Leste nian. Por exemplo, se iha suco Nitibe ita bele ona halakon analfabetismo, maibé sei dok tebetebes atu alcança produtividade agrícola; iha suco Holsa produtividade agrícola, liu-liu háre, dí'ak liután ona, maibé ninia população barak liu mak sei la hatene nafatin lé no hakerek.

Ne atu hateten deit katak la iha ema ida mak hatene liufali realidade suco ida nian do que ninia comunidades locais rasik. Indicadores sociais iha Relatórios Sucos nian, nebé agora ami apresenta ida-ida hodi halo comparação ho distritos idaidak nian no ho país tomak, fó biban ba ita nia líderes locais rasik atu identifica hodi halo tuir plano.

Portanto ita fó hikas fali ba ita nia Povo resultados dí'ak tebetebes nebé hetan ona, ho formato simples no fácil atu compreende, hodi nuné comunidades sira bele conhce sira nia an rasik no contribui ba sira nia desenvolvimento.

Ohin ita hahú processo ida nebé sei lori tempu semana nén, nebé líderes locais, namkari iha país tomak, sei hetan biban atu aprende liután kona-ba situação real iha sira nia sucos no kona-ba oinsá atu estabelece no atingi alvos desenvolvimento iha nível local.

Ohin, ita reconhece publicamente katak plano ida iha nível nacional sei la iha sentido karik la sura ho envolvimento poder local no la iha participação activa husi timoroan tomak.

Senhoras no senhores,

Hau hein katak líderes comunitários tomak sei simu sasadik ida né ho responsabilidade, atu bele estabelece objectivos claros ba sira nia comunidades, hodi nuné sira bele envolve iha ninia implementação no garante monitorização nebé dí'ak.

Serviço hamutuk, actores nacionais ho locais, mak ita bele hetan progressos bot ba ita nia Nação. Importante mos hanoin katak quanto mais ita hatene ita nia an rasik, ita sei iha liután kebít atu desenvolver ita nia comunidades.

Relatórios kona-ba Sucos ho sessões trabalho kona-ba Sensus Fo Fila Fali, tulun ita fahe conhecimentos – no conhecimento mak hanesan instrumento ida ke dí'ak liuhotu nebé ita iha atu lori muda buat nebé precisa muda ho desenvolve áreas nebé iha potencial atu bele desenvolve sai dí'ak liu.

Portanto, hau declara katak projecto disseminação kona-ba Sensus Fo Fila Fali loke oficialmente ba país tomak.

Hau hein katak maluk-sira hotu bele aproveita didi'ak instrumento ida ne lori servi ho dedicação no laran kamán ba população timornian tomak, nudar rikusoin murak no bot liuhotu Nação ne nian.

Ita nia Censos hakerek hodi hatudu kona-ba ita nia moris ohin loron nian. Mai ita serviço hamutuk lori decide kona-ba buat nebé ita hakarak ba loron aban-bainrua nian.

Muito obrigado.

Kay Rala Xanana Gusmão

4 Novembro 2011